

Cruz Cora a haya donacion di entrada di HCCA

ORANJESTAD - Durante un recepcion bon atendi diadomingo anochi den Renaissance Convention Center pa duna inicio na e HCCA (Health Care Conference Aruba), tabata reina un ambiente ameno.

E entrada di e anochi ta na beneficio di Cruz Cora, mescos cu e 'silent auction' di obranan di artistanan local, cu ta tumando luga durante henter e Conferencia. Minister di Salubridad y Deporte di Aruba dr. Alex Schwengle, anfitrión di e evento a yama bon bini na Minister di Salubridad di Hulanda sra. drs.



Edith Schippers y colega di Corsou Minister dr. Ben Whiteman. Oradornan di e evento a alegra e anochi cu

nan presencia. Miembronan di Parlamento y demas invitadonan a mescla y tur caminda por a mira gruponan ta



papia cu otro riba temanan cu tin nan interes.

Prome cu e show di Resona a cuminsa Minister Schwengle a dirigi algun palabra na esunnan presente pa splica un rato e importancia di e Conferencia cu ta resultado di un reunion di IPKO (Interparlamentair Koninkrijksoverleg). E intencion di HCCA ta pa trece mas coordinacion y cooperacion entre e islanan di Reino Hulandes. Presidente di Cruz Cora sr. Eddy Oduber a gradici e organisacion y tur presente pa nan aportacion na Cruz Cora y den corto a splica kico tur ta e trabou di Cruz Cora ta encera. Un institucion cu ta conoci mundialmente cu ta draai grandemente riba e trabou di boluntario. Oduber a

conta con tempo di e temblor na Haiti con Cruz Cora di Aruba mesora a duna un man mandando profesionalnan y provision pa e pais cu a caba di sufrir un desaster natural sin igual. Na 2017 Cruz Cora Aruba ta cumpli 60 aña di existencia na Aruba.

E show di Resona cu a sigui tabata den un solo palabra 'tremendo'. Tur hende a gosa un mundo. E sala completa a lanta para klap man, balia y canta hunto cu e cantantenan. Por a mira Minister Schippers participa activamente mescos cu Minister Whiteman. E zjeito cu e orkestra bou direccion di sr. Ivan Quandus a trece, a duna bida na e anochi aki. Por bisa cu e prome anochi di HCCA tabata un exito rotundo. □